

# Ma'had Islam Brunei terima kemasukan pelajar baharu

Berita dan Foto : Dk. Vivy Malessa Pg. Ibrahim

TUTONG, Khamis, 7 Januari. - Kewujudan sekolah-sekolah Arab di negara ini adalah sangat signifikan dan berkait rapat dengan usaha pihak kerajaan bagi melahirkan rakyat yang berpengetahuan tinggi khususnya dalam bidang agama dan seterusnya nanti akan berperanan penting dalam mengukuhkan lagi penghayatan hidup beragama di negara ini.

Sehubungan itu, sesi pendaftaran kemasukan pelajar-pelajar baharu Sanah 5 Sekolah-Sekolah Arab

seluruh negara bagi musim penggal baharu persekolahan Tahun 1442 Hijrah bersamaan 2021 Masihi diadakan serentak.

Bagi Daerah Tutong, tumpuan tertumpu di Ma'had Islam Brunei yang menyaksikan seramai 89 pelajar baharu Sanah 5 memulakan sesi pengajian mereka terdiri daripada 44 pelajar lelaki dan 45 pelajar perempuan.

Sesi pendaftaran pada tahun ini agak berbeza berbanding dari tahun sebelumnya iaitu bagi mematuhi dan mengikuti SOP

yang ditetapkan.

Seperti lazimnya, semasa pendaftaran tersebut, diadakan sesi taklimat namun pada tahun ini, para pelajar terus sahaja masuk ke dalam kelas masing-masing.

Sebelum memasuki kelas, para pelajar diminta untuk membuat pemeriksaan suhu badan terlebih dahulu dan digalakkan untuk mengamalkan penjarakan sosial serta menjaga kebersihan diri khususnya semasa berada di dalam premis sekolah.

Ma'had Islam Brunei dirasmikan oleh Kebawah Duli Yang Maha Mulia Paduka Seri Baginda Sultan dan Yang Di-Pertuan Negara Brunei Darussalam pada 17 Julai 1990.

Semenjak penubuhannya hingga kini, maktab tersebut banyak mencapai kejayaan khususnya dari segi akademik antaranya peningkatan peratus pelajar yang



ANTARA pelajar baharu Sanah 5 yang memulakan sesi pengajian mereka di Ma'had Islam Brunei.

mendapat keputusan 5A dalam Peperiksaan Penilaian Sekolah Rendah (PSR), di samping peningkatan pencapaian dalam Peperiksaan Sijil Pelajaran Agama (SPU).

Sistem pembelajaran yang diguna pakai di persekolahan Arab ini terbukti mampu melahirkan cendekiawan dalam kedua-dua bidang iaitu agama dan juga umum.

## Pentingnya bahasa Arab sebagai bahasa pengantar



FAKULTI Bahasa Arab juga sentiasa memantau kualiti program dan aktiviti yang diadakan dengan mengkaji semula juga memperkembangkan khususnya program-program yang ditawarkan, sesuai dengan keperluan pelajar dan peredaran zaman.

Oleh : Nooratini Haji Abas

Foto : Azmah Haji Ahad, Ihsan Dr. Muhamad Alif Haji Sismat

GADONG, Rabu, 6 Januari. - Bahasa Arab sangat sinonim dengan Islam sebagai bahasa Al-Quran.

Bahasa Arab telah lama digunakan oleh masyarakat Arab sebelum Islam lagi.

Di sini jelas dan nyata bahawa penggunaan bahasa Arab itu meluas di seluruh dunia.

Di Negara Brunei Darussalam, penggunaan dan pembelajaran bahasa Arab sudah lama digunakan dan dipraktikkan, sama ada di jabatan-jabatan kerajaan mahupun sektor swasta, institusi-institusi pendidikan tinggi, maktab-maktab, sekolah-sekolah menengah, sekolah-sekolah rendah, pusat-pusat pembacaan Al-Quran dan banyak lagi.

Sebagaimana titah Kebawah Duli Yang Maha Mulia Paduka Seri Baginda Sultan dan Yang Di-Pertuan Negara Brunei Darussalam agar keutamaan dan fokus utama sekolah seimbang serta selaras di antara mata-mata pelajaran agama Arab yang

menggunakan bahasa Arab sebagai bahasa pengantar dan juga mata-mata pelajaran umum yang menggunakan bahasa Inggeris.

Ke arah melihat perkembangan bahasa Arab dan prospeknya, Pensyarah Fakulti Bahasa Arab, Universiti Islam Sultan Sharif Ali (UNISSA), Dr. Muhamad Alif bin Haji Sismat dalam temu bual bersama Pelita Brunei menjelaskan, pembelajaran dan pengajaran bahasa Arab secara umumnya telah lama diterapkan di sekolah-sekolah Arab dan ia juga digunakan sebagai bahasa pengantar untuk mata pelajaran Agama.

Bagi UNISSA, Kursus Bahasa Arab katanya, juga merupakan antara kursus wajib universiti yang perlu diambil dan menjadi bahasa pengantar bagi kursus-kursus dalam program-program aliran Arab.

Walau bagaimanapun, pembelajaran dan penggunaan bahasa Arab tegasnya, perlu terus dititikberatkan dan diperkasakan kerana masih terdapat kekurangan

dalam penguasaan bahasa Arab dalam kalangan pelajar.

Oleh itu, UNISSA, melalui Fakulti Bahasa Arab ujarnya, bergiat aktif dalam membarigakan pembudayaan penggunaan bahasa Arab dalam kalangan pelajar dengan mengadakan pelbagai aktiviti bahasa, seperti Karnival Bahasa Arab, bengkel-bengkel, seminar-seminar, perkhemahan bahasa Arab serantau dan sebagainya.

Setentunya, terdapat pelbagai cabaran dan masalah dalam pembelajaran dan pengajaran bahasa Arab.

Menurutnya, Fakulti Bahasa Arab juga sentiasa memantau kualiti program dan aktiviti yang diadakan dengan mengkaji semula dan memperkembangkan khususnya program-program yang ditawarkan, sesuai dengan keperluan pelajar dan peredaran zaman.

"Ketika ini, fakulti ini juga menawarkan kursus-kursus terjemahan sebagai sebahagian daripada program-program yang ditawarkan dari peringkat Sarjana Muda hingga ke peringkat Doktor Falsafah," terangnya lagi.

Justeru, bahasa Arab tambahnya, perlu terus diperkembangkan



GAMBAR Hiasan ... Sebagaimana titah Kebawah Duli Yang Maha Mulia Paduka Seri Baginda Sultan dan Yang Di-Pertuan Negara Brunei Darussalam agar keutamaan dan fokus utama sekolah seimbang serta selaras di antara mata-mata pelajaran agama Arab yang menggunakan bahasa Arab sebagai bahasa pengantar juga mata-mata pelajaran umum yang menggunakan bahasa Inggeris.

supaya dapat memperkasa penggunaan bahasa Arab, bukan sahaja dalam kalangan pelajar, bahkan dalam kalangan masyarakat, khususnya di dalam era Revolusi Industri 4.0 ini.

"Teknologi digital, seperti media sosial, memainkan peranan penting dalam memberikan impak yang positif kepada pembelajaran dan penguasaan bahasa Arab dalam kalangan masyarakat melalui platform-platform media sosial, seperti Instagram, Facebook dan Twitter," ujar beliau lagi.

Inisiatif ini katanya, juga sedang digiatkan oleh Fakulti Bahasa

Arab melalui akaun Instagram : @fbaunissa, sesuai dengan keperluan masyarakat.

Dr. Muhamad Alif seterusnya menyatakan, dengan adanya program-program yang menarik dan dinamik, dihasrat dapat mempertingkatkan lagi kemahiran dan membudayakan penggunaan bahasa Arab, khususnya dalam kalangan pelajar di negara ini.

Selain itu, program-program atau aktiviti-aktiviti bahasa Arab akan menarik minat masyarakat di negara ini untuk terus cenderung ke arah penggunaan dan pembelajaran bahasa berkenaan.

fbaunissa



297 Posts

564 Followers

40 Following

Faculty of Arabic Language

Fakulti Bahasa Arab, UNISSA

Tel: +673 2462000 | Ext 232

Email: fal@unissa.edu.bn

Followed by nacha.kittvaroom